

DOMINGU III PÁSKUA – TINAN B

Tema

Jezús moris hi'as duni? Oinsá mak ita bele halo esperiénsia ida enkontru nian ho Jezús moris hi'as? Oinsá ita bele hatudu ba mundu katak Jezús moris no kontinua oferese ba ema salvasaun? Ba kestaun sira-ne'e mak liturjia Domingu III Páskua nian buka hatán.

Evanjellu asegura mai ita katak Jezús moris no kontinua sai sentru atu hodi harii komunidadade eskolante sira-nian. Iha enkontru komunitáriu, iha diálogu nu'udar maun no biin-alin sira-nian ne'ebé partilla fiar hanesan, rona Maromak nia Liafuan, domin hatudu ho jestu fraternidade no servisu nian – mak eskolante sira bele halo esperiénsia enkontru nian ho Jezús moris-hi'as. Hasoru tiha Jezús, eskolante sira simu konvite atu fó sasin iha ema sira nia oin.

Leitura dahuluk apresenta mai ita eskolante sira nia sasin kona-ba Jezús. Hatudu tiha ho jestu konkretu katak Jezús moris no kontinua oferese salvasaun, Pedro no João konvida interlokutór sira atu simu proposta moris nian ne'ebé Jezús halo ba sira.

Leitura daruak fó hanoin katak ema sarani, hasoru tiha Jezús no aseita moris ne'ebé Nia oferese, tenke moris ho forma koerente ho kompromisu ne'ebé nia asume. Koerénsia ne'e hatudu ho atitude hatene rekoñese frajilidade sira ne'ebé halo parte realidade umana no liuhusi esforsu ida fidelidade nian ba Maromak nia ukun-fuan sira.

LEITURA I - Apóst 3,13-15.17 -19

Ita iha Jerusalém, iha entrada Templu nian. Pedro no João (“par” ne'e mosu beibeik hamutuk iha Livru Apóstulu sira-nia Hahalok iha parte dahuluk – kf. Apóst 4,7-8.13.19) ba Templu ba orasaun “ora nona” nian (tuku 3 loraik). Mane ida, moris mai ain-kude'ik kedas, ne'ebé tuur iha Templu nia odamatan (hanaran “Formosa”) hateke ba sira no husu esmola. Pedro dehan katak nia la iha “osan-mean no osan-mutin” atu fó; maibé, hodi Jezús Kristu Nazarenu nia naran”, kura nia. Ema hotu halibur iha pórtiku Salomão nian hakfodak no hakarak rona esplikaun husi Pedro nia ibun kona-ba faktu oinseluk liu ida-ne'e (kf. Apóst 3,1- 11). Ema sira ne'ebé sai sasin Maromak nia hahalok nian “hakfodak”. Ne'e mak reasaun ne'ebé akontese mós ho ema lubun-boot sira ne'ebé simu Jezús nia jestu libertadór sira. Testu ohin nian halo parte diskursu ne'ebé, tuir Lucas, Pedro halo ba ema lubun-boot (kf. Apóst 3,12-26).

Iha figura sira Pedro no João nian, Lucas apresenta mai ita sasin dahuluk komunidadade Jerusalém nian, hodi kontinua Jezús nia misaun no apresenta ba ema sira Maromak nia projetu salvasaun nian. Sasin ne'e la'ós de'it ho pregasaun maibe mós eskolante sira nia asaun. Eskolante sira nia liafuan no sasin hatudu oinsá mundu muda bainhira salvasaun to'o no ema ne'ebé atan sai ema livre. Sasin ne'e provoka opozisaun husi sira ne'ebé metin ba sira-nia eskema, hakribi Maromak nia dezafiu sira. Tan ne'e mak, Jezús nia eskolante sira, manu-ain ba mundu foun ne'e sei hetan persegisaun (kf. Apóst 4,1-22).

MENSAJEN

Pedro, hodi dirije ba israelita sira, halo sira komprende katak jestu ne'ebé halo ema ain-kude'ik di'ak fali, halo hodi Jezús nia naran. Jezús nia projetu kontinua realiza no ida-ne'e hatudu katak Jezús moris. Bainhira sei la'o tuir dalan sira Palestina nian, Jezús hatudu, ho

jestu konkretu sira, Maromak nia prezensa ne'ebé salva iha ema sira nia leet. Eskolante sira mak ajente sira ne'ebé, liuhusi sira Jezús kontinua ninia obra libertadora no salvadora iha mundu.

Iha ninia “sasin”, Pedro hahú hodi refere akontesimentu dramátiku sira ne'ebé lori ba Jezús nia mate, nu'udar rezultadu husi isarelita sira nia rejeisaun ba Maromak nia planu salvasaun nian. Maromak oferese moris ba sira no sira hili mate; sira hili fó moris ba ema ne'ebé lori mate no kondena ba mate ema ne'ebé oferese moris (v.14-15a). Maibé Jezús moris hi'as; ne'e mak prova katak Maromak nia projetu mak proposta ida ne'ebé fó moris, moris ida ne'ebé mate labele halakon (v. 15b).

Maski Israel hakribi, Maromak sei fó nafatin oportunidade atu nia korrije ninia hilin laloos no halo opsaun foun ba moris. Pedro “hatene” katak Povu nia hahalok hakribi Maromak nia projetu mai husi ignoránsia. Iha lejislasaun relijioza Israel nian, falta “involuntária” sira hetan tratamentu espesiál no merese tratamentu diferente husi falta “voluntária sira” (kf. Lv 4). Nune'e, iha ninia laran-sadia, Maromak kontinua oferese ba nia Povu possibilidade atu korrije opsaun sala sira no hili moris, hodi adere ba Jezús no ba projetu ne'ebé Nia apresenta. Prova ba ne'e mak ema ain-kude'ik ne'ebé hetan don moris nian husi Maromak.

Atu oferta salvasaun nian sai efetiva, ema presiza “arrepende” no “konverte” an. Verbu rua ne'e define movimentu atu orienta hikas moris ba Maromak, hodi halo nia sai sentru moris nian no rona Maromak nia proposta sira hodi moris tuir. Tanba Kristu mak Maromak nia manifestasaun, “arrepende” no “konverte” an signifika adere ba Jezús, fiar Nia, simu projetu ne'ebé Nia lori mai, tama iha Reinu ne'ebé Nia haklaken no propoin.

LEITURA II - 1 Jo 2,1-5a

Ita haree tiha ona iha domingo kotuk katak hakerek eh Surat dahuluk João nian ne'e iha ton polémiku – dirije ba comunidade sarani sira iha parte osidentál Ázia Menór nian – buka atu kombate doutrina erética pré-gnóstika sira no apresenta ba sarani sira dalan auténtiku moris sarani nian.

Erétiku sira-ne'e hanoin sira “hatene Maromak” (1 Jo 2,4), “haree Maromak” (1 Jo 3,6), moris iha komuñaun ho Maromak (1 Jo 2,3) maibé moris iha kontradisaun ho revelasaun sarani. Sira lakohi haree katak Jezús mak Mesias (kf. 1 Jo 2,22) no Maromak nia Oan (kf. 1 Jo 4,15), rekuza enkarnasaun (kf. 1 Jo 4,2). Ba ereje sira-ne'e, Kristu lalehan nian tama iha Jezús Nazaré ne'ebé ema de'it, iha Batizmu (kf. Jo 1,32-33), uza nia atu hatudu revelasaun no molok nia terus, husik tiha nia, basá Kristu lalehan nian labele terus. Komportamentu morál ereje sira-ne'e nian la loos: sira hanoin sira la iha salan (kf. 1 Jo 1,8.10) no sira la moris tuir ukun-fuan sira (kf. 1 Jo 2,4), ho modu partikulár ukun-fuan domin nian (kf. 1 Jo 2,9).

Ne'e mak pretensaun sira ne'ebé testu ohin nian denunsia. Ema ne'ebé dehan la halo salan, nia bosok-teen; no, tempu hanesan, halo Maromak sai bosok-teen. Se nune'e karik, tansá Maromak tenke haruka nia Oan-Mane iha mundu ho proposta salvasaun nian, se salan la'ós realidade universál ida (kf. 1 Jo 1,8-10)?

MENSAJEN

Iha parte dahuluk ita-nia testu nian (v. 1-2), autór kritika ho modu haksumik ereje sira ne'ebé konsidera la iha salan no sujere ba sarani sira atitude loos ne'ebé Maromak hein husi sarani ida-idak kona-ba kestaun ne'e.

Sarani ida-idak simu bolun ba santidade no atu moris iha vida ida hakribi salan nian. Maromak bolu nia au rejeita egoísmu, autosufisiénsia, injustisa, opresaun (nakukun) no hili naroman. Maski nune'e, salan mak realidade ida ita labele evita, mai husi ema nia frajilidade

no frakeza. Sarani ida tenke iha konxiénsia kona-ba realidade ne'e no rekoñese nia salan. La halo ida-ne katak taka an iha auto-sufisiénsia, katak rekuza salvasaun ne'ebé Maromak oferese, nune'e, "sala".

Sarani rekoñese nia fragilidade maibé la dezespera. Nia hatene katak Maromak oferese salvasaun ba nia no katak Jezús Kristu mak "advogadu" ("parakletos", ita bele tradús ba "defensór") ne'ebé defende. Nia mai mundu atu elimina salan – ema hotu nia salan.

Iha parte daruak (v. 3-5a), autór surat nian refere ba ereje sira-nia pretensaun katak sira koñese/hatene Maromak, maibé la preokupa atu rai Ninia ukun-fuan sira. Iha linguajen bíblika, "koñese Maromak" la'ós koñesimentu teóriu no abstratu, maibé moris iha komuñauñ íntima ho Maromak, iha relasaun pesoál prosimidade nian, familiaridade nian, domin lahó limite nian. Nune'e, ema ne'ebé dehan iha relasaun prosimidade no komuñauñ pesoál ho Maromak, maibé lakohi rona ninia proposta no indikasaun sira, nia bosok. Ita labele dehan hadomi no la konsidera ema ne'ebé ita hadomi ninia proposta sira. "Koñese Maromak" ezije atiude konkreta husi rona ba simu no moris tuir proposta salvasaun sira ne'ebé Maromak halo liuhusi Jezús.

EVANJELLU – Lc 24, 35-38

Evanjellu ohin nian situa ita iha Jerusalém, liutiha resurreisaun. Dixípulu na'in sanulu-resin-ida halibur malu no hatene ona Jezús mosu ba Pedro (kf. Lc 24,34), nune'e mós Jezús moris-hi'as nia enkontru ho dixípulu sira Emaús nian (kf. Lc 24,35).

Maski nune'e, sira sente ta'uk, hakfodak, laran rua-rua, tanba ambiente hale'u sira rai kunan ba sira. Eskolante sira sente ta'uk no inseguransa tanba sira seidauk halo esperiénsia enkontru nian ho Kristu moris-hi'as.

Iha sesaun ikus nia Evanjelu nian, Lucas hakarak hatudu oinsá dixípulu sira deskobre, ho modu progresivu, Jezús ne'ebé moris hi'as; nia hakarak afirma ba sarani tempu hotu nian katak, Kristu kontinua moris no prezente, akompaña nia Kreda, no dixípulu sira halibur iha komunidadade, bele halo esperiénsia enkontru loos nian ho Jezús moris-hi'as.

Ba ninia katekeze, Lucas uza ilas sira atu nu'udar meiu atu apresenta mensajen: katekeze komunidadade sarani nian kona-ba ninia esperiénsia enkontru nian ho Jezús moris no moris-hi'as.

MENSAJEN

Jezús nia resurreisaun mak invensaun ida Kreda primitiva nian, eh dixípulu sira nia mehi ida, ho esperansa katak sira-nia esperiénsia ho Jezús la remata ho fracasu krús nian no rate ita ke'e iha fatuk boot iha?

Ba kestaun ida-ne'e mak Lucas buka hatán. Iha ninia katekeze, Lucas halo klaru katak resurreisaun mak faktu réal ida, maibé dixípulu sira deskobre no koko depoizde dalan naruk ida, difisil, todan, nakonu ho laran rua-rua no inserteza sira.

Relatu hotu Jezús moris-hia's nia aparisaun nian, ko'alia kona-ba difikuldade sira ne'ebé dixípulu sira sente atu fiar no rekoñese Jezús moris-hia's (kf. Mt 28,17; Mc 16,11.14; Lc 24,11.13-32.37-38.41; Jo 20,11-18.24-29; 21,1-8). Difikuldade ne'e istórika no signifika katak Jezús nia resurreisaun la'ós akontesimentu ida siénsia komprova, la'ós materiál, bele kapta ho mákina fotográfika no kámara sira televizaun nian. Iha relatu sira aparisaun nian, dixípulu sira la'ós grupu ida ne'ebé fiar lalais de'it eh simu iluzaun naran de'it; maibé sira mak grupu ida deskonfiadu, krítiku, ezijente, ne'ebé to'o ba fiar iha Jezús moris no moris-hi'as depoizde dalan ida ± naruk no ± difisil.

Dalan fiar nian la'ós dalan evidénsia materiál nian, prova ne'ebé ema bele kona, demonstrasaun sientífika; maibé dalan ida halo ho fuan nakloke ba Maromak nia revelasaun, prontu atu simu esperiénsia Maromak nian no vida foun Nia oferese. Iha dalan ne'e nia rohan (ba balun naruk, ba balun la demora kle'ur), dixípulu sira esperimenta, laho dúvida katak, Jezús moris duni, la'o ho sira iha dalan istória nian no kontinua oferese ba sira Maromak nia moris. Sira hahú dalan ho dúvida no inserteza sira; maibé sira halo esperiénsia enkontru nian ho Kristu moris no sira to'o iha serteza resurreisaun nian.

Elementu ruma destaka iha Lucas nia katekeze:

1. Iha sira-nia dalan fiar nian, dixípulu sira deskobre Jezús nia prezensa, moris no moris-hi'as, iha komunidadade nia leet. Nia kontinua sai sentru ba komunidadade nia moris. Jezús haraik dame (“shalom” nu'udar armonia, hakmatek, konfiansa, moris nakonu – v. 36).

2. Jezús moris no moris-hi'as mak Maromak nia Oan, ne'ebé liutiha dalan ho ema sira, nia tama hikas iha Maromak nia mundu. “Hakfodak” no “ta'uk” mak reasaun normál ema nian iha divindade nian oin (v. 37). Jezús la'ós ema ne'ebé moris fali ba moris uluk nian iha rai, maibé Maromak ne'ebé tama ho modu definitivu iha esfera divina.

3. Dixípulu sira nia laran rua-rua hatudu sira-nia difikuldade tuir dalan fiar nain, to'o enkontru pesoál ho Na'i moris-hi'as nu'udar esperiénsia fiar ne'ebé sai tasak (vers. 38).

4. Elementu materiál sira (“kona” Jezús – v. 39-40; Jezús han “ikan tunu” – v. 41-43) mak forma ida atu hanorin katak esperiénsia enkontru nian ho Jezús la'ós iluzaun eh produktu ida imajinasaun nian, maibé esperiénsia ida forte liu no markante ba sira nia moris. Ne'e mak forma ida atu dehan mós katak Jezús ne'ebé dixípulu sira hasoru, maski diferente no la rekoñese, mak ida ne'ebé la'o ho sira iha dalan sira Palestina nian, hodi haklaken no propoin Maromak nia salvasaun. Ikusmai, Lucas mós hanorin katak, Jezús kontinua tu'ur ho nia eskolante sira iha meza, kontinua estabelese tali familiaridade no komuñuan nian, partilla sira-nia mehi, sira-nia luta, sira-nia esperansa sira, sira-nia difikuldade sira, sira-nia terus sira.

5. Jezús moris-hi'as revela sentidu kle'an Eskritura sira-nian. Jezús la kumpre de'it Eskritura maibé sai ninia intérprete mós. Jezús nia komunidadade tenke halibur hadulas Jezús moris-hi'as atu rona Liafuan ne'ebé fó sentidu ba nia dalan iha istória (v. 44-46).

6. Dixípulu sira, habosu an ho Liafuan, simu husi Jezús, misaun atu fó sasin iha “nasaun sira hotu, hahú husi Jerusalém”. Tema sentrá anúnsiu nian mak Jezús nia mate no moris-hi'as. Finalidade misaun Kreda Jezús nian (dixípulu sira) mak haklaken arrepimentu no perdaun ba salan sira ba mane no fetu hotu, hodi propoin ba sira opsau ba moris foun Maromak nian, ba salvasaun, ba moris rohan-laek (v. 47-48).

Lucas apresenta iha-ne'e sínteze badak misaun Kreda nian, tema ne'ebé nia dezenvolve luan liu iha livru Apóstolu sira-nia Hahalok.